



Inatsisartunut ilaasortamut  
Najaaraq Møller  
Siumut

29-07-2024  
Suliap normua 2024-10523  
Allakkap ilisarnaataa 24285057

Postboks 260  
3900 Nuuk  
Oqarasuaat (+299) 34 50 00  
Nass. (+299) 34 66 66  
Email: iian@nаноq.gl  
www.naalakkersuisut.gl

## **Angerlarsimaffiup avataanut inissinneqartunut meeqqanut tunngatillugu § 37 naapertorlugu apeqquteqaammut nr. 130-imut akissut**

Asasara Najaaraq Møller.

Apeqqutinut qujanaq. Apeqqutit tullinguuttut ataasiakkaarlugit assilineqarsimapput, akissutinik tullearlutik.

Apeqqummut Kommune Kujallermit, Avannaata Kommunianit, Qeqqata Kommunianit, Kommune Qeqertalimmit aamma Kommuneqarfik Sermersuumit isummersuutunik pissarsiniartoqarsimavoq.

### **1. Meeqqat angerlarsimaffiup avataanut inissittakkat ikilisarneqarnissaannut Naalakkersuisut iliuusissamik pilersaaruteqarpat?**

#### **1a) Taamaappat, sunik pilersaaruteqarpat?**

Akissut:

Naalakkersuisut iliuusissatut pilersaarutaata 'Pitsaaliuinerit pitsaanerit, inissiinerit ikinnerit: Ilaqutariinni pitsaaliuinerimik suliaqarnermut iliuusissatut pilersaarut 2023-2023' meeqqat inuusuttullu angerlarsimaffiup avataani inissinneqartartut amerlassusiisa appartinnissaat siunertaraa. Angerlarsimaffiup avataani inissinneqartartut amerlassusiisa appartinnissaannut Naalakkersuisut sulissuteqarput, ukunatigut kommunit periarfissaat pitsaanerulersillugit: Ilaqutariit inuuniarnermikkut unaminartorsiortut ataqatigiinnerusumik assigiiarnerusumillu ilaqutariittut katsorsarneqarnissaanut neqerooruteqarfigineratigut oqilisaaffigisarneratigullu angerlarsimaffiup avataanut inissiisoqaaqqinnginnissaanut siusissukkut paasisaqarfigalugit. 'Pitsaaliuineq pitsaanerusoq, inissiinerit ikinnerusut' pillugit iliuusissatut pilersaarummi pingaaruteqartoq tassaavoq Namminersorlutik Oqartussat kommunillu akornanni peqatigiilluni suliniuteqarneq. Peqatigiilluni suliniuteqarneq aallartisarfimminiippoq Avannaata Kommunianit aamma Kommune Kujalleq peqatigiilluni suliniuteqarnermi ilaassusatut kommunini toqqarneqarsimallutik. Peqatigiilluni suliniuteqarneq ilaqutariinnut pitsaaliuilluni suliniutaareersunik aallaaveqassaaq: Siusissukkut Iliuuseqarneq, Ilaqutariinnik siunersioqatigiinneq aamma MANU. Peqatigiilluni suliniuteqarneq tamatuma saniatigut suliniutinik nutaanik suliaqassaaq soorlu: Ilaqutariinnik oqilisaassisunik aamma nakuusertarneq pillugu qaammarsaanernik annertunerusumik atuineq. Peqatigiilluni suliniuteqarnermi meeqqanut



angerlarsimaffiup avataani inissinneqarsimasunut angajoqqaanik suleqateqarneq katsorsaasarnerlu sammineqassapput.

'Pitsaaliuineq pitsaanerusoq, inissiinerit ikinnerusut' pillugit iliuusissatut pilersaarummi aamma peqatigiilluni suliniuteqarnermi ilaqutariinni siusinnerusukkat akuliuttarnissaq, sumiiffinni isumalluutininik atuinissaq piffissamilu sivilu inissiisarnerit sapinngisamik pinngitsortinnissaat Naalakkersuisunit siunniunneqarpoq.

## **2. Meeqqat angerlarsimaffiup avataanut inissittakkat angerlarsimaffiminnut/angajoqqaaminut utertinneqarsinnaanissaannut Naalakkersuisunit iliuusissatut pilersaaruteqartoqarpa?**

**2a) Aamma angajoqqaat meerarisaminnik utertitsinissaminnut angajoqqaajulluarnissaannik tunngaviliinertalimmik siunnersorneqarlutillu inerisarneqarnissaannut Naalakkersuisut sunik iliuusissatut pilersaaruteqarpat?**

2-mut akissut:

Apeqqummut 1-imut aamma 2a-mut akissutit innersuussutigineqarput.

Angerlartitsinermut inatsisitigit sinaakkutit eqqarsaatigalugit takuuk apeqqut 5-imut akissut.

2a-mut akissut:

'Pitsaaliuineq pitsaanerusoq, inissiinerit ikinnerusut' pillugit iliuusissatut pilersaarummi suliniutit 'Angajoqqaat meeqqanik

sumiginnaasarnerat

akiorniarlugu

nuna

tamakkerlugu iliuusissanut pilersaarut 2020 - 2030'-mut, 'Ilaqutariinnermut Naalakkersuisut politikkiat 2020-2023'-mut kiisalu iliuusissatut pilersaarummut 'Meeraaneq nalitooq 2023 - 2030'-mut atatillugu isigineqassaaq. Iliuusissatut pilersaarummi 'Meeraaneq nalitooq'-mi suliniutit MANU aamma Siusissukkat Iliuuseqarneq erseqqissaatigineqarsinnaapput. Suliniutit taakku angajoqqaat angajoqqaatut ineriartornissaannut ikorfartuisuupput. Taakku meeraasa angerlartinneqarnissaat sioqqullugu meeqqanut inissinneqarsimasunut angajoqqaajusut ineriartorsimanissaat pingaaruteqarpoq.

## **3. Meeqqat angerlarsimaffiinnut, pisortat pigisaannut namminersortunullu Namminersorlutik Oqartussat ukiumut qanoq aningaasartuuteqartigisarpat?**

Akissut:

Meeqqat tapersersorneqarnissaannut Inatsisartut inatsisaanni § 56 naapertorlugu ulloq unnuarlu paaqqinnittarfiit kommuninit aningaasalersorneqarput. Meeqqat tapersersorneqarnissaannut Inatsisartut inatsisaanni § 33, imm. 3 naapertorlugu ulloq unnuarlu paaqqinnittarfiit Naalakkersuisunit, kommunalbestyrelsinit ataatsinit arlalinnilluunniit ataatsimoorunneqarlutik imaluunniit paaqqinnittarfiit imminnut pigisunit pilersinneqarlutillu ingerlanneqarsinnaapput.

2022-mi meeqqanut inuusuttunullu nuna tamakkerlugu namminersorlutik oqartussat ulloq unnuarlu paaqqinnittarfiit inissiinerit kommunit 184,4 mio. kr.-inik aningaasartuuteqarsimapput. Ukioq taanna nuna tamakkerlugu namminersorlutik oqartussat ulloq unnuarlu paaqqinnittarfiit 6,8 mio. kr.-inik Naalakkersuisunit aningaasartuuteqarput. Taakkununga ilaangillat, kommunit kommuninit ingerlanneqartunut ulloq unnuarlu paaqqinnittarfiit namminerlu pigisunut aningaasartuutaat.



#### **4. Kuserneq-mi immaqaluunniit MANUmi angajoqqaajulluarnissamut tunngasut siammarnissaat eqqarsaatigalugu ilikkakat siuaruaanneqarsinnaanissaannut suliniuteqartoqalikkersarpa?**

Akissut:

Kuserneq aamma MANU tassaapput angajoqqaatut isumagisassat isumaginissaannut angajoqqaanut ikorfartuineramik siunertaqartut neqeroorutit. Siusissukkut Iliuuseqarnermik Naalakkersuisut annertunerusumik sammisaqarsimapput suliassaqarfimmilu tassani Kuserneq aamma MANU neqeroorutaallutik tulluurtut. Kuserneq Nuummi angajoqqaanut neqeroorutaavoq. MANU nuna tamakkerlugu angajoqqaanut neqeroorutaavoq. Kusernermit MANUmiillu misilittakkat ingerlaavartumik pitsanngorsarneqarlutillu neqeroorutinit attuumassuteqartunut tulluarsarneqarput. Kusernermiit MANUmiillu misilittakkat siunertanut allanut atorneqarnissaannik pilersaaruteqartoqangilaq.

Apeqqutip matuma akineqarnissaanut Kommuneqarfik Sermersuummiit Kusernermi sullissinissamik neqerooruteqartumiit isummersuutininik pissarsiniartoqarsimavoq. Kommuneqarfiup Sermersuup apeqqut imatut akisimavaa: Meeqqanut Ilaqutariinnullu Ingerlatsivik Kusernermik aamma MANUmi misilittagaqarluarpoq. Taakku marluutillugit atuinnaannik Kommuneqarfik Sermersooq pilersaaruteqarpoq. Nalinginnaasumik isigalugu siusinnerusumut naleqqiullugu Siusissukkut Iliuuseqarneq aallunnerunissaannik kommunalbestyrelse kissaateqarpoq. Sermersuumi Meeqqanut Ilaqutariinnullu politikata nutarterneqarnera ukiami naamassillugu Ingerlatsiviup naatsorsuutigaa sularineqassasoq. Taassuma siunissami Kommuneqarfik Sermersooq sumut sammiveqarumaarnersoq takutikkumaarpaa.

#### **5. Meeqqat angerlarsimaffiup avataanut inissineqartut angajoqqaavi pisortaqarfinit meeqqap angerlarteqqinneqarsinnaanissaannik qanoq attavigineqartigisarpat suullu pisortaqarfinit angajoqqaajusunut suliniutigineqartarpat?**

Akissut:

Meeqqanut Inuusuttunullu Naalakkersuisoqarfiup apeqqutip taassuma akinissaanut nunami kommunit tallimat isummersuuteqaaqqullugit qinnuigisimavai. Ataani takuneqarsinnaapput kommunit ataasiakkaat akisutaat.

##### **Kommune Kujalleq:**

Angerlarsimaffiup avataani inissiisoqarnissaa sapinngisamik sioqqullugu ikiorsinissamik angajoqqaat neqeroorfigineqartarput. Taamaakkaluartoq angerlarsimaffiup avataani inissiineq pisariaqarsinnaasarpoq. Tamanna tassaasinaavoq nakuuserneq, kinguaassiuutitigut atornerluineq, paarsinerlunneq angerlarsimaffeqannginnerlu pillugit suliat. Angerlarsimaffiup avataani inissiinermi sullissisup angajoqqaallu akornanni qanimut suleqatiginneq pilersinneqartarpoq. Angajoqqaat ilitsersuunneqartarput. Angerlarsimaffiup avatannut meeqqanik inissineq sapinngisamik angajoqqaatut oqartussaasumit akuersinertaqartillugu pisarpoq. Takuuk Meeqqat tapersorsorneqarnissaannut Inatsisartut inatsisaanni § 27. Imatut pisoqarsinnaavoq angerlarsimaffiup avataani inissiineq angajoqqaatut oqartussaasoq akuersitinnagu pisimasinnaalluni, tak. Meeqqat tapersorsorneqarnissaannut Inatsisartut inatsisaanni § 28.

Angerlarsimaffiup avataanni inissiinermut atatillugu isumaginnikkut misissuisoqarlunilu iliuusissatut pilersaarusiortoqassaaq. Meeqqat tapersorsorneqarnissaannut Inatsisartut inatsisaanni § 45-mit aamma § 46-mit tamanna takuneqarsinnaavoq. Meeqqat angerlarsimaffiup avataani inissineqarsimasut angerlartinneqarnissaat tamatigut anguniagaasarpoq. Angerlartinninnerini meeqqap angerlartinneqarnissaanut angajoqqaat qanoq annertutigisumik piareersimanersut naliliiffineqartarput.



Sulinermi tassani ilaqutariinnik katsorsaaviit ilaqutariillu illui peqataatinneqartarput. Ilaqutariit ilaqutariinnullu illut ilaatigut angerlarsimaffinnut pulaartarput, angerlarsimaffimmi atukkani illullu naliliiffineqartarlutik.

Meeqqamik angerlarsimaffiup avataani inissinneqarsimasumik ataatsimuuleqqinnissamut angajoqqaat kissaateqarnerat pingaaruteqartuuvoq. Angajoqqaat ilai meeqqami angerlartinnaannut piunasaqaatinik naammassinninnissamut kajumissuseqarneq ajorput. Tamatuma suleqatigiinneq ajornarnerulersittarpaa. Angajoqqaat allat meeqqami angerlartinneqarnissaat sorsuutigisarpaat. Angerlarsimaffiup avataani inissiinnermut pissutaasut eqqarsaatigalugit suliat suliarineqartarput. Suliamik suliarinninnermut atatillugu oqaloqatiginnittoqartarpoq, aamma meeqqamik sullissivimmiit soorlu meeqqerivinniit atuarfimmilluunniit paasissutissanik katersisoqartarluni. Taakku saniatigut angajoqqaat taakkulu inissisimanagerat allanngorsimanersoq pillugu nalilersuisoqartarluni.

### **Kommuneqarfik Sermersooq:**

Meeqqap angerlarsimaffiup avataanut inissinneraniit ullormit siullermiit angerlartitsisoqarnissaa sulissutigineqartarpoq. Tamanna angajoqqaat, oqartussani sullissisut peqqusisimasullu akornanni suleqatigiittoqarneratigut pisarpoq. Meeqqap angerlartinneqarnissaanut, siullermik, piunasaqaatit uku naammassineqarsimassapput: Angajoqqaat nammineq ineqarnissaat, angajoqqaat imigassamik aannagaaarniutinilluunniit atornerluisuunnginnissaat. Taakku saniatigut: Angajoqqaat najugaqarfigisat meeqqamik angerlartitsinissaminnut kajumissuseqassapput. Kiisalu angajoqqaat najugaqarfigisat piffissami sivilisuumi ikioqatigiinnissamik kajumissuseqassapput.

Meeqqap angerlartinneqarneranut atatillugu angajoqqaat piffissami sivilisuumi tarnikkut timikkullu katsorsartillutillu perorsaaniikkut katsorsarneqassapput. Suliniut taaneqartarpoq pilersaaruseriorluarluni angerlartitsineq tassaallunilu ilaqutariinnut ineriartuutaasumik ingerlatsiffiusoq ukiut pingasut tikillugit sivilisussuseqarsinnaasoq. Angajoqqaat oqartussanit sullissisunit pilersaaruseriorluarluni angerlartitsinissamut innersuunneqartarput kingornalu Suliniuteqartup angajoqqaat attavigisarlugit taakku PAPIK-mi ingerlanissaat neqeroorutigalugu. PAPIK tassaavoq Nuummi meeqqanut ilaqutariinnullu sullissivik. PAPIK pilersaaruseriorluarluni angerlartitsinissamut atatillugu ilaqutariinnik meeqqanillu ilitseruinissamik neqerooruteqartarpoq. PAPIK angerlarsimaffimmi pulaarnermik, katsorsaaniissamik, siunnersuinissamik ilitseruinissamillu neqerooruteqarsinnaavoq.

PAPIK aamma oqartussani sullissivik angerlarsimaffiup avataani inissinneqarsimasunut meeqqanut angajoqqaanut anguniakkanik makkuninnga sulissuteqarpoq:

- Angajoqqaat isumassuiniikkut piginnaasatigut ineriartornissaannik ikorfartorneqarneri meeqqallu pisariaqartitaanik aallaaveqarnissamik ilinniartinneqarlutik.
- Angajoqqaat ajorunnaarsaalluni perorsaaniikkullu sullissivimmi ikorfartorneqartarput.
- Angajoqqaat meeqqamillu inissiiffiusoq suleqatigalugit meeqqap ajornartorsiutai pillugit suliarinninnerit, tassunga ilanngullugit meeqqap alliarturneraneersinnaasut ajornartorsiutit.
- Meeqqaminnut angajoqqaatut akisussaaffeqarnissaannut/angajoqqaatut oqartussatut akisussaaffeqarnissaannut angajoqqaat kajumissuseqalernissaannik ikorfartuineq.

### **Qeqqata Kommunian:**

Ikinnerpaamik sapaatip akunneranut ataasiarluni angerlarsimaffiup avataani inissinneqarsimasumut meeqqamut angajoqqaat aamma ikorsisarfup akornanni oqaloqatigiittarnerit. Angajoqqaat pisariaqartitaat apeqqutaatillugu ataatsimiinnerit akornanni piffissaq sivilisuneruinnaasarpooq. Angerlartitsinissaq piffissanngoraangat suliniutillu aallartinneqarlutik angajoqqaat akulikinnerusumik aggersarneqartarput. Angajoqqaat ilai pikkorissarnissamut neqeroorfigineqartarput. Angajoqqaat inissiaqarnikkut akiitsullit akiitsut



akilersornissaannut aningaasaqarnikkut ikiorneqarnissamik neqeroorfigineqartarput. Ilaqutariinnik sullissiviit angerlarsimaffiup avataani inissinneqarsimasumik meeqqamik angerlartitsinermut atatillugu oqaloqateqarnissamik ilaqutariinnut neqerooruteqartarput. Oqartussaaffeqarfik taannaavoq ilaqutariinnik katsorsaavimmuut ilaqutariinnik innersuussisinnaasoq.

Iliuusissatut pilersaarut naapertorlugu angerlarsimaffiup avataani inissinneqarsimasumik angerlartitsinermit ikinnerpaamik ukiup affakkaartumik malitseqartitsisoqassaaq. Malitseqartitsineq ilaqutariinnik katsorsaavik suleqatigalugu pissaaq. Tassani meeqqamik angerlartitsinerup angajoqqaanut annertuallaannginnissaa isiginiarneqartarpoq.

#### **Kommune Qeqertalik:**

Angerlarsimaffiup avataanut inissinneqarsimasunut meeqqanut angajoqqaanut kommune ingerlaavartumik atassuteqartarpoq. Tamanna katerisimaarnermut, tikeraarluni angalanerut imaluunniit angajoqqaat inuuniarnikkut ilungersuuteqarsinnaanerinit atatillugu pisinnaavoq. Angajoqqaat inuuniarnikkut allatigut ajornartorsiuteqarpata taava taakku kommunimi isumaginnittoqarfimmuut atassuteqassapput. Pisoqartarpoq meeqqap angerlartinnissaanut angajoqqaat kommunimut saaffiginnittarlutik imaluunniit angerlarnissaq pillugu meeraq nammineq kissaateqartarluni. Angajoqqaanut attaveqarnermi angajoqqaat taakkunanilu pissutsit pitsaanerulersimanersut pillugit ingerlaavartumik nalilersuisoqartarpoq. Tassunga ilanngullugu meeqqap pisariaqartitaanik naammassinninnissamut angajoqqaat pitsaanerulersimanersut.

Angerlartitsinissap pisinnaasutut kommune naliliippat meeqqap pisariaqartitaanut naleqqiullugu meeqqamik, angajoqqaanik angerlarsimaffimilu pissutsinik misissuinerit annertuut aallartinneqartarput. Tamanna pisarpoq angerlartitsinissaq pillugu aalajangiinissaq sioqqullugu. Piffissap inissiiffiusup nalaani aamma angerlartitsinissap piareersarnerani suliniutit aallartinneqartut tassaasinnaapput angajoqqaanut taakkulu ilungersuutaannik ikiuinerit. Taakkunaniissinnaapput atornerluisuunermik katsorsaaneq, Alliaq aqutigalugu ikiuineq, suliffeqarnikkut aningaasaqarnikkullu pissutsit pitsaanerulersinnissaannut ikiuineq, ilaqutariinnik katsorsaaneq, immikkut pisariaqartitsisunik meeqqanik assigisaanilluunniit isumaginninneq.

#### **Avannaata Kommunia:**

Suliamik sullissinerup nalaata ingerlanerani angajoqqaatut oqartussaasunik kommunip attaveqarnera taamaalillunilu ikiorsiinerit pilersinneqartutut inissiinerup nalaani. Tak. pisortat ingerlatsineranni suliassat suliarineqartarnerat pillugu Inatsisartut inatsisaat aamma Meeqqat tapersersorneqarnissaannut Inatsisartut inatsisaat. Meeqqat tapersersorneqarnissaannut Inatsisartut inatsisaanni § 46 malillugu iliuusissatut pilersaarusiornissamut kommune pisussaaffeqarpoq. Iliuusissatut pilersaarummi allanneqarsimasut anguniakkat angunissaannik kommuni sulisarpoq. Anguniakkat anguneqarpata ikiorsiisarnerit unitsinneqassapput, tak. Meeqqat tapersersorneqarnissaannut Inatsisartut inatsisaanni § 40. Ikiorsiisarnerit unitsinneqarnissaat sioqqullugu pissutsinik misissuisoqassaaq, tak. Meeqqat tapersersorneqarnissaannut Inatsisartut inatsisaanni § 41.

#### **Tassani angajoqqaatut oqartussaassuseqartut ilanngutitinnissaanut inatsisitigut tunngaviit aamma angerlartitsinissamut inatsisitigut tunngaviit malinneqartarput:**

Angerlarsimaffiup avataanut meeqqanik inissiinermit angajoqqaatut oqartussaasut isumassuisulluunniit allat ilaatinnaannut inatsisitigut tunngaviit Meeqqat tapersersorneqarnissaannut Inatsisartut inatsisaanni oqaasertalerneqarsimapput. Meeqqat tapersersorneqarnissaannut Inatsisartut inatsisaanni § 46 naapertorlugu kommunalbestyrelse meeraq pillugu iliuusissatut pilersaarusiussaaq. Iliuusissatut pilersaarut



angajoqqaatut oqartussaassusillip allalluunniit isumaginnittuusut meeqqallu oqaloqatiginerisigut suleqatiginerisigullu sapinngisamik suliarineqassaaq. Oqaatigineqassaaq angerlarsimaffiup avataanut inissiinerimi aamma piffissami meeqqap angerlareernerata kingorna meeqqap angerlarsimaffiani isumassuinikkut avatangiisit nukittorsarnissaannut ikiueriaatsit suut immikkut kommunalbestyrelsimit pilersinneqartussatut naatsorsuutigineqarnersut, iliuusissatut pilersaarummi peqatigisaanik allassimassammata. Meeqqap angajoqqaaminut isumassuisuminullu qanigisaminut aalajangersimasumik inuttut attaveqarnissaa imaluunniit atassuteqarnissaa qanoq ililluni qulakkeerneqassanersoq iliuusissatut pilersaarummi allaaserineqassaaq, tamanna meeqqamut ajoqutaassanngitsutut nalilerneqarpat.

Suliap suliarinerata nalaani iliuusissatut pilersaarummi aalajangersarneqarsimasut meeqqap atugarissaarnissaanut ineriartornissaanullu anguniakkat angunissaannut kommunimi oqartussat suliaqassapput. Meeqqat tapersorsorneqarnissaannut Inatsisartut inatsisaanni § 40 malillugu anguniakkat anguneqarpata imaluunniit ikiorsiissutit tapersorsuinermit siunertamut ikorfartuunnaarpata ikiorsiinerit atorunnaassapput. Meeqqat tapersorsorneqarnissaannut Inatsisartut inatsisaanni § 41 malillugu inissiinerup atorunnaarsinnissaa sioqqullugu angerlartitsinissamut pissutsinik misissuisoqassaaq. Kommunalbestyrelsip tassunga atatillugu uku paasiniassavai: Angajoqqaatut oqartussaassusillip, Meeqqat tapersorsorneqarnissaannut Inatsisartut inatsisaat malillugu ikiuinissamik suliniuteqarfigineqarluni meeqqap pisariaqartitaanik naammassinnissinnaassaaq. Meeraq oqaloqatigineqarsimassaaq. Inissiiffiusumit allaganngorlugu oqaaseqaammik pissarsiniartoqarsimassaaq. Meeraq angajoqqaallu angerlartitsinissamut piareersarluarsimassaaq. Angerlartitsinissamut iliuusissatut pilersaarusiortoqarsimassaaq kiisalu meeqqap angajoqqaatullu oqartussaassusillip piffissami angerlartitsinerup siuninngua kingornalu meeqqap attaveqarfigisartagarisimasinnaasaasa ikiorserneqarnissaannik piareersaasoqarsimassaaq.

## 6. Angajoqqaajulluarnissamut Naalakkersuisut inuiaqatigiinnut sunik suliniuteqarpat?

Akissut:

Naalakkersuisunut pingaaruteqarpoq angajoqqaat tamarmik angajoqqaatut isumaginninnissaannik ikorfartorneqarnissaat. Tamanna atuuppoq angajoqqaatut immikkut ikiorserneqarnissamik pisariaqartitsisoqarnersoq imaluunniit pisariaqartitsisoqannginnersoq apeqquaatinnagu. Angajoqqaat tamarmik angajoqqaatut isumaginninnermi inissilluarnissaannut isumassarsiffissamik siunnersorneqarnissamillu atorfissaqartitsinnaapput. Angajoqqaajunermi atukkat nunamilu tamarmi meeqqat ineriartornerini pitsaanerulersinniarlugit suliniutinik Naalakkersuisut aallartitsisimapput. Suliniutit taamaallitlukk meeqqat angerlarsimaffiup avataanit inissinneqartarnerini pitsaaliornissaanut iluaqutaassapput.

Angajoqqaatut isumaginninnermut atatillugu angajoqqaanut ikorfartuinnermut sammisut Naalakkersuisut suliniutaat: MANU, MANU+ oqaloqateqatigiittarnissat, Siusissukkut Iliuseqarneq aamma Ilaqutariinni aqqutissioqatigiinneq.

Suliniutit nutaajunerpaat tulliuuttumi naatsumik saqqummiunneqarput:

- *MANU+ oqaloqatigiittarnissat* tassaavoq angajoqqaanut mianernartumik inissisimaffeqartunut ikorfartuinissamut ineriartortissimasaq. Oqaloqatigiittarnissat sulisunut sakkutut atorneqarput. Oqaloqatigiittarnissat angajoqqaanik ilitsersuinerinik oqaloqateqarnermillu siuarsaanermi atorneqassapput. Taamaalliluni siunertaavoq angajoqqaatut piginnaasat nukittorsarnissaat meeqqallu toqqissimasumik alliarternissaasa qulakkeernissaat.
- *Siusissukkut Iliuseqarneq pillugu najoqqutassap* atulersinnerata siunertaraa suliaqartut assigiinngitsut akornanni suleqatigiinnerit pitsaanerulersinnissaat. Najoqqutassiaq angajoqqaat



mianernartunik inissisimaffeqartut taakkunungalu unamminartut ikiornissaanut ilusilersugaavoq. Angajoqqaanik mianernartumik inissisimaffeqartunik ikorfartuinissamut ilitersuussinissamullu isiginninneq tamakkiisumik sammissaaq aamma oqartussat ingerlataqarfiillu peqataasut akornanni ataqatigiissarneqarsimassalluni. Ingerlataqarfiit akornanni suleqatigiinnerup pitsaanerulersinneratigut taakku meeraasa qajannaatsumik toqqissisimasumillu angerlarsimaffinnik pilersitsinissamut angajoqqaanut pisariaqartutigit ikorfartuinnermut peqataassapput. Siusissukkut Iliuuseqarnek pillugit najoqqutassiaq immikkut ilisimasallit suleqatigiissitallu attuumassuteqartut peqataaneri tunuliaqutaralugit ineriartortinneqarsimavoq. Tassunga ilanngullugu kommuniniit, peqqinnissaqarfimmiit ingerlataqartuniillu allaniit sinniisut.

Angajoqqaanut mianernartumik inissisimaffeqartunut Naalakkersuisut immikkut pisussaaffeqarput. Meeqqat tapersersorneqarnissaannut Inatsisartut inatsisaanni § 26 naapertorlugu angajoqqaanngortussanut ikorsiinissamik suliniuteqarnermik kommunalbestyrelse neqerooruteqarsinnaavoq, taakku inooriaaserisaat meeqqap suli erniusimangitsup ingerlalluarnernanut, peqqissusianut peroriartorneranullu ulorianartorsioritissappata. Aammattaaq pingaaruteqarluni angajoqqaatut akisussaaffimminnik kivitsinnaanngitsut angajoqqaat alaatsinaannissaat. Meeqqat tapersersorneqarnissaannut Inatsisartut inatsisaanni § 23 malillugu angajoqqaat akisussaanagerat pillugu oqaloqatigiinnissamut angajoqqaatut oqartussaassusilik kommunip aggersarsinnaavaa, meeqqap ineriartornera imaluunniit ingerlalluarnera navianartorsioritinnearpat angajoqqaatut oqartussaassusillip akisussaanagerminik naammassinnissinnaannginneranik tamanna pissuteqarpat.

Tamatuma saniatigut oqaatigineqassaaq meeqqanut ilaqutariinnillu sullissiviit ilaqutariinnullu illut meeqqanut, inuusuttunut ilaqutariinnullu, tassunga ilanngullugit ilaqutariinngortussanut siunnersuinissamik, ilitersuussinissamik katsorsaanissamillu pisussaaffeqarmata. Meeqqanut ilaqutariinnullu sullissiviit ilaqutariinni aqutissioqatigiinnissamik neqerooruteqarnissamut pisussaaffeqarput. Tamatumunnga inatsisitigut tunngavik meeqqanut ilaqutariinnullu sullissiviit, ilaqutariit illui aamma qimarnguiit pillugit Namminersorlutik Oqartussat nalunaarutaanni qulakkeerneqarpoq, ulloq 1. februar 2024-mi atulersinneqartoq, tak. § 1 aamma § 5.

## 7) Angajoqqaajulluarneq Naalakkersuisunit qanoq oqaasertalersorneqarpa?

Akissut:

Angerlarsimaffiit marluk imaluunniit angajoqqaat marluk assigiinngillat. Angajoqqaajulluarnermut ataatsimut ilisarnaataasoq Naalakkersuisut malillugit tassaavoq: Angajoqqaap imaluunniit angajoqqaatut oqartussaassuseqartup meeqqamik isumassuinnermigut meeqqap atugarissaarneranik ineriartorneranillu ikorfartuinissaa. Isumassuineq meeqqap atugarissaarneranut ineriartorneranullu tunngaviuvoq. Isumassuinnerup kingunerisaanik timikkut, tarnikkut, anersaakkut, ileqqorissaarnikkut inooqataasutullu ineriartornermi meeqqap pisariaqartitaanik angajoqqaap imaluunniit angajoqqaatut oqartussaasoq iluaqutaassaaq. Meeqqami ineriartornermi pisariaqartitsinerit taakku meeqqap pisinnaatitaaffii pillugit FN-ip isumaqatigiissutaani eqqaaneqarsimapput, tak. artikeli 27. Naalakkersuisut malillugit angajoqqaajulluarnermik ilisarnaataapput: Angajoqqaap imaluunniit angajoqqaatut oqartussaasoq sutigit tamatigut meeqqap ineriartorneranut ikorfartuissaaq - asannittumik, toqqissisimasumik isumassuisumillu.

Iliuusissatut pilersaarut 'Pitsaaliuineq pitsaanagerusoq, inissiinerit ikinnerusut' aallaavigalugu Naalakkersuisut sulissutigisaat tassarpiaavoq asannittunik isumassuisunillu angajoqqaaqarlutik angerlarsimaffimmi toqqissisimanartumi meeqqat alliarternissaat. Angajoqqaajulluarnermik isiginniffik pingaarutilik tassaavoq



angajoqqaap imaluunniit angajoqqaatut oqartussaasup atugarissaarfiusumik, peqqinnartumik ineriartorfiusumillu alliariornermik meeqqamut neqerooruteqarsinnaanera. Taamaalilluni meeraq toqqissisimanartumik isumassuisumillu avatangiiseqarluni, inersimasunik, ilaqtanik inuttullu ataveqarfigisartakkanik toqqissisimanartunik tatiginartunillu atassuteqarluni.

Inussiarnersumik inuulluaqqusillunga

  
Aqqaluaq B. Egede